

13. november

UKA2018/229

Nunat Avannarliit Killiit Siunnersuisoqatigiiffiata Savalimmiuni, Kalaallit Nunaanni Islandimilu Naalackersuisunut kaammattuutigaa aalisarnermi ilinniartitaanerit eqqarsaatigalugit nunat akornanni suleqatigiinnissamut periarfissat misissoqullugit.

Nunat Avannarliit Killiit Siunnersuisoqatigiiffiata Savalimmiuni, Kalaallit Nunaanni Islandimilu Naalackersuisunut kaammattuutaa aalisarnermi ilinniartitaanerit eqqarsaatigalugit nunat taakkua akornanni suleqatigiinnissamut periarfissat misissorneqarnissaannut sammititaq Siumumiit imaattumik oqaaseqarfigissavarput.

Nunat sanilerisagut assigalugit aalisarnikkut inuussutissarsiorneq nunatta nappatigaa, taamaattumillu aalisarnerup ineriartortittuarnissaa naleqqussartuarnissaalu pisariaqartuarluni. Nunat Avannarliit Killiit Siunnersuisoqatigiiffiata kaammattuutaanut Siumup isumaqataanera oqaatigissavara, matumani aalisarnermi ilinniartitaanerit eqqarsaatigalugit nunat taakkua akornanni suleqatigiinnissamut periarfissanik misissuisoqarnissaa eqqarsaatigalugu. Nunatsinni aalisarnikkut inuussutissarsiorneq tassaavoq inuussutissarsiuqarnermi pingaarnersaq, taamaammallu aalisarnerup ineriartortittuarnissaanik nalimmassartuarnissaanillu sulinerup nukittorsartuarnissaa pingaaruteqarluinnarpoq – aamma nunat pineqartut akornanni.

Nunatsinni aalisarnerup silarsuaani ullumikkornit suli pikkorissuseqarnerulluta ingerlariaqqissinnaasariaqartugut Siumumi isumaqarpugut, tassami assersuutigalugu suliareqqiisarnerit atortorissaarutitigullu siuarsaaniarnerit eqqarsaatigiinnarlugit inuussutissarsiuqarnermi pitsaanerusumut inissinneqarnissaanut annertuumik alloriartitsisinnaanerit qulakkeeqataaffigisariaqarparput.

Siumumi ilisimalluarparput ilinniartitaaneq tassaasoq aningaasarsiornermi ingerlallualernerunissamut sakkussat pingaarnert ilaat, taamaammatt aalisarnerup iluani ilinniartitaanerit eqqarsaatigalugit periarfissanik suli pitsaanerusunik ujartuinissat ilassilluarpagut. Nuna sanilerisarput Island qiviaanaraani annertuumik aalisarnerup iluani ilinniartitsinerit ingerlappai, taamaalilluni suliffissuaqarnikkut aalisariuteqarnikkullu patajaattumik siuariartorfiusumillu ingerlatsisoqarluni. Siumumiit taamatut naatsumik oqaaseqarluta siunnersuut manna tamakkiisumik taperserparput.

Anders Olsen, Siumut

Oqallilluarisilu

Anders Olsen, Siumut